



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Starc-i Bumrah ajateta ICC No. 1 Test bowler kümogo

Iran aser Oman na khien atema Hormuz corridor asoshi jembar

VOL. XXIII ISSUE NO. 315 (ADOK 315) DIMAPUR YANGTEPNÜ (THURSDAY) LUROI (AUGUST) 27, 2026

₹ 5.00

Assam-Nagaland arrtsülen mangatettep adok

Guwahati, August 26, 2026

(Agencies): Golaghat district nung Assam-Nagaland arrtsü anasa aliba No. 2 Negheribil nung alirtemi Bodbarnü police tsüingdang ken o ka benokogo aser iba ya Nagaland nung telok kati tashiyim inyakba atema lir.

Mongulbar nikongdang iba tesem nung ken o angatetteptsü atema senden ka amenba sülen Bodbarnü Merapani police station nung ken o benok.

Tanü Negheribil telungi gari kar nung rubber saplings bener arudang tensa mejungi aküm ta yimdaklirtemi ashir. Assam Forest Department-i asüingdangyatsü atema garitem sot.

Longayim aser Mikirang villages chairman Hussain Lotha-i anir nisung 30-40 shi kati hadir bener aru aser iba tesem nung alirtem merenshi ta parnokisa ashi.

"Naga nung telok jagi onoki mepishiba mangaba dang masü saka onok dak teka sangshi aser yirutsü. Parnoki onok amokmeren" ta police tsüingdang benokba ken o nung shia lir.

Parnokisa aibelenertem dak ozüing tapet agi merenshitsu akhangba den aser arrtsülen aliba yimtsüing nung meinprongtsü akok ta shia lir.

Iba osang zülü tashi nung Merapani police station-i FIR mebenok lir.

Bodnarnü No. 2 Negheribil nung alirtemi Lotha den olemteptsü atema adenshi ajisüaka senden metenzükdang raratep.

Mongulbarnü timtem agütsüba Naga nung ana aru aser Assam Forest Department personnel lia raratep ta No. 2 Negheribil nung alirtemi ashi.

Tebang agi raratepba sülen teka sangshitsuäsa aküm aser idangji CRPF aser Merapani Police tiyongtsü ia noktang. Iba tesemi sepaitem aruba sülen Nagaland nungi aruba telok oadok ta yimdaklirtemisa ashi.

Iba tatalokba sülen Takam Mising Porin Kebang (TMPK) nungi teshimtet nübo kati Assam arrtsülen aliba Nagaland yimdaklirtem anema 'economic blockade' asütsü metetdaksüogo.

"Ozüing alema inyaktertem merenshitsuäsa aser council anati Mising village aser TMPK den senden ka mena lemtet ka agitsü akhangar. Parnoki iba amaji meinyakra onoki economic blockade alitsüsa akümtsü" ta pai ashi.

Nagaland nung amenoka aliba Lotha Lower Range Public Organisation (LLRPO)-i No. 2 Negheribil ya Nagaland kübok Longayim aser Mikirang villages telongtet nung lir ta ashiba sülen tanü iba ya atalokogo.

LLRPO-i Nagaland sorkar dang tebang aitsü kechiyong iba ken o nung Nagaland litsü, lisopur ali kiburtem aser Assam-Nagaland arrtsü mangatettep dak kongshir ta ayongzüko.

"Iba ya kibong 59 anienba onük dang masü aser kecha meinyak yutsüra eviction exercise sülen timtem ajurutsü" ta LLRPO-isa metetdaksüogo.

KU & ATASU-i peace committee ka tentettsü

Guwahati, August 26, 2026

(Agencies): Konyak Union (KU) aser All Tai Ahom Students' Union (ATASU) tsüingda arrtsü ken o aser tanga onüktem olemtep ajanga angatetteptsü mulungtepogo.

August 22 nü Sivasagar, Assam nung külem senden ka amendang tesentepertemi Konyak aser Tai Ahom nung tsüingda alemli nungi tesentaktep aliba akangshitep.

Parnokisa mangatettep madoktsü, tongteprateptsü aser tarutsü nung ken o adokra timi angatetteptsü atema Peace Committee ka tentettsü bangiemtepogo.

Senden nung arrtsü dak sendakba ken o mesüra kin ana tsüingda onüktem Konyak Union aser ATASU-i indangindanga jembitsü mulungtepogo ta KU Press and Media Secretary Kaibo Konyak-i ashi.

Ibala olemteppi kati ka akhümtsübutepa aser

angatepapa alitsü aser third-party organization medeni alitsü ta pai ashi.

Iba Peace Committee nung telok anaprong nungi teshimtet nübotem adentsü aser parnokki mapang shia tongteprateptsü, tali angatetteptsü aser nüngdak adokdang olemtep alitsü.

Nagaland kübok Mon district aser Assam kübok tesem kar nung anentsüh aser tüzümsüing lendong ajuruba indang senden nungsa benoka lemsatöp. Parnoki Assam aser Nagaland sorkartem dang lendong atalokba atema scientific aser technical assessments asütsü ayongzüko.

ATASU Sivasagar aser Charaideo district committees den women's councils aser Konyak Union Mon, Konyak Students' Union aser Konyak Mother Association nungi teshimtet nübotem iba senden nung aden.

NSF ILRC ajanga BEFR, 1873 atema National Seminar ayonger



Dimapur, August 26, 2026

(TYO): Naga Students' Federation nung Inner Line Regulation Commission (ILRC) ajanga anogo ananü Awareness on Bengal Eastern Frontier Regulation (BEFR), 1873 indang National Seminar ayongzüka lir.

Iba sentong ya August 28 aser 29, 2026 anogotem Town Hall, Dimapur, Nagaland nung agitsü.

Iba shisatokden ya national-level policy consultation ka ama ayonger aser Bengal Eastern Frontier Regulation, 1873 meteta alitsü aser angatettsü atema agitsü.

Iba shisatokden nung Supreme Court of India nungi

Senior Advocate ana- Eno Prashant Bhushan aser Enoli Shomona Khanna nati shisalen sayur ama shilem agitsü. Tena dak alia North Eastern Region nung aliba university tem nungi academic experts aser Home Commissioner, Government of Nagaland nungeria shisalen sayutsü.

New Delhi aser mainland India nungi o jembaritem Nagaland-i arudar aser asüing tashi nung tanüingba ajak atongtsü ta ILRC, NSF Media Cell ajanga sangdong ka nung ashi.

Maneni, Nagaland Chief Minister-ia August 29, 2026 nü

sentong nung adentsü mulunga agizükogo aser pa adenba ajanga Nagaland nung BEFR indang policy akangshitsu aser mapa tajungba inyaktsü imlar.

Anogo ananü shisatokden nung Nagaland aser North Eastern Region tesem balala nungi teshimtet nübo 350 shi adentsü imlar.

Iba shisatokden ajanga policymakers, legal experts, scholars, community institutions aser stakeholders tsüingda shisalemsateptsü aser BEFR, 1873 jungjunga asadangtsü imlar ta parnokisa ashi.

NSF-i Dimapur nung shilem agitsüpurtem ajak pelashishia agizüker aser Bengal Eastern Frontier Regulation, 1873 takok ngua inyaktsü atema national consultation tajung ka alitsü imlar ta ILRC NSF Media Cell-isa metetdaksüogo.

Impur tenla ki atema tenla tulu agütsür



Impur Baptist Arogo tenla ki tasenba tang tesüdak noksa ka yangi angur. Impur Baptist Arogo nung yabo tanga Arogo nung ama teti alitsü pur züingsem mali, saka ABAM nung inyaktertem den Impur Bible Seminary aser Clark Memorial school nung inyaker aser azüingertem dang züingsem lir. Ibayongji, iba tenla ki ya Ao Baptist Arogotem nung amangba purtem ajak meyong ama akümer. (Impur, August 26, 2026).

Mkg. August 26 (TYO) : Impur nung 1936 küm America nung missionary Rev. B.I. Anderson-i anir süng aser yinjung agi yangluba tenla ki tejen akümba agi, yaküm küm nungi tenzüka Impur tenla ki tasen ka yangludagi.

Iba tenla ki tasen yangluba osang angashia kija kibong, lokti aser arogo aikati tenla tajung agütsüdagi aser item tenla agütsürtem rongnung, tesüingmangtsü tepelatsü kaji, Mokokchung town nung aikati meteta aliba nisung, Mongtibai pai aatetba rongsen nungi Impur tenla ki tasenba yangluba nung amshitsu asoshi tenla sen Rs.1000 agütsüogo. Pa ya arishi küm 79 lir aser temang nunga mekokmein kanga lir. Pa ya temang nung tashi itta aliba mapangbo Mokokchung town nung khu bentsüba mapa meranga inyaker rongnung ka

liasü.

Ano, Mokokchung nungsa tamanger kibong ka nung, aonung kibong tekülem mapang tebui par kinungertem dang Impur arogo tenla ki yanglutsüba khuret indang lemsatöpa sarasadem aser sarasadem mejangtsü mapang, parjala, küm ter tain, Lisendongi la ket nung akaba sen ajak agi sen Rs. 500 bener arua tebu nem Impur tenla ki asoshi agüjang ta ser tenla agütsü. Iba jagi tebu o tetsü na mulungjang kanga kongshi aser par kibongi Impur tenla ki asoshi tenla sen Rs.50,000 agütsütsü lemteter lia, ano enoksemer sen lakh ka agütsütsü mulungtet.

Impur Mission Compound nung Dr. Rev. E.W. Clark aser kinungtsü Mary Mead, Rev. S.A. Perrine aser kinungtsü, Rev. F.P. Haggard aser kinungtsü, parnokki anir 1896 küm Impur Baptist

Arogo tenzü, ajisüaka tenla kibo 1936 küm-ang yanglutet. Iba tenla kidang tanü tashi Impur Baptist Arogo sentep agia arudagi.

Iba tenla ki tejenba ya mebendoki nüngo amai ayutsü saka tekülem sentep sentongtem sadema agitettsü asoshi tenla ki tasen ka yanglu tenzüko. Iba tenla ki asüba nung sen ajak agi crore pezü lakh roker tenet shi nüngdaksü ta tenla ki asüba mapa nung ketdangsertemi metetdaksüogo. Iba tenla ki yangluba maparen dak sendakba nung tongtepratepnertemi item ketdangsertem den tongtepratep sütettsü : Sanny Pongener (Kohima) – 9436008573; Er. Philip Imchen (Mokokchung) – 7005643192; Anungla Walling (Dimapur)- 9402696594 aser Dr. Akok Amer, Pastor (Impur)- 8732014312.

Dimapur Police-i aket mozü bottles 19,790 apu



Dimapur, Luroi/August 26 (TYO): Dimapur Police-i Mongulbar nikongdang Marwari Patti, Dimapur nung warehouse ka meita aoba mapang codeine amshia yangluba südi ta temulung melemteti aket mozü bottles 19,790 apu, koba temesepba mozü aika apuba rongnung ka alitsü ta police-i ashir.

Bodhbarnü sangdong ka nung ashiba agi, itdangiter nungi osang aruba nung ajemdaker Sub-Urban Police Station nungi team kati August 25 nikongdang Jain Temple Road, Marwari Patti, Dimapur nung House No. 23-B nung aliba warehouse ka meita ao.

Police temi aiben jaaka taa

agütsür iba warehouse amshir ya maru, anungji ACP (West) ajanga temelaba agüja pai repranga lia warehouse ya kakpok ta ashi. Independent local witnesses lia iba ki meita bushi aser e-Sakshya platform ajanga digitally document süogo, ta ashi.

Parnoki iba tesem nung meita bushiba mapang aket mozü südi ta temulung melemi aliba cartons 126 ngutet. Yangji cartons 101 nung Bescod Cough Syrup bottles 16,160 liasü aser cartons 25 nung EBDYL Cough Syrup bottles 3,600 liasü.

Ano mejangjaba pharmaceutical oset aika jangjatsü atema parnoki bener

ao, ta police-i ashi.

SBN Police Station nung Section 21(C) of the Narcotic Drugs and Psychotropic Substances (NDPS) Act kübok sou motu ken o ka benokogo. Police temi iba warehouse amshia alirtem jangjatsü, supply chain tsüngsü aputsü aser local distribution network kaktetsü asoshi bushisüngdangba mapang lir ta ashi.

Dimapur Police-i nüburtem aser civil society organisations tem dang temesepba mozü ayokba indang osangtem anasatiba police station den lemsateptsü ayongzük aser osang agütsürtem maitsü temai madoktsütsü ta ashi.

INC nungi councillor asem NPF nung denogo



Dimapur, Luroi/August 26 (TYO): Mongulbarnü Indian National Congress (INC) nungi elected councillors asem Naga People's Front (NPF) nung denogo aser par asem ya Chümoukedima aser Tuli Town Councils nungi alitsü.

Councillors asem ya Ward No. 8, Chümoukedima Town Council nungi K Wati Imchen; Ward No. 6, Tuli Town Council nungi Temsumenba Imsong aser Ward No. 8, Tuli Town Council nungi K Imlitemjen Jamir alitsü, ta sangdong ka ajanga ashi.

NPF secretary general aser Advisor Achumbemo Kikon lia

Kohima nung party indang Central Office nung parnok NPF nung aniokba sentong ya agia liasü.

Kikon-i parnok party nung pelashishia agizükba o jembidang, parnok NPF nung adentsü telemtetba agiba ya tongtipang mera ka alitsü ta ashi aser parnok aniokba ajanga grassroots nung party aliba tashi itshtitsü ta ashi.

Pai NPF indang regionalist political identity aser yimjung aser democratic yimya nung Naga yimten asoshi lenmang bushiba nung bendanga agütsür inyakba indang lemsatepa liasü.

Kikon-isa Naga nunger maitsü, sobaliba aser senmang wazüka ayuba nung tera yanger inyaksangshir ta ashi.

NPF Senior Vice Presidents N Bendang Jamir aser Charlie Sekhose den Vice President (Organisation and Establishment) Benjamin Lorin nungeri councillors asem ya pela agizükba o jembia aser parnok aniokba ajanga pei aliba tesem nung party tashi itshtitsü tamang akar ta ashi.

Iba sentong nung NPF lenirtem, central office bearers aser councillors asem meina arurtem dena liasü.

Assam-Meghalaya arütsü manga-tettep mechi tourism nung akoksar

Shillong, Luroi/August 26 (Agencies): Tawa Assam den mangatettep aliba mapang state indang tourism industry shilem 100 jungnüa akoksaogo, ta Meghalaya Tourism Minister Timothy D Shira-i Bodhbarnü ashi, kechiaser tourist tem aruba kanga ajemogo aser gari senzüba nung tenokdangba agütsüba ajanga tourism dak metaloka aliba businesses nunga kongshir.

Meghalaya Assembly session tenzük ananü buba nung jembidang, mangatettep aser lenmang tem mokdangba ajanga hotels, homestays aser tanga businesses tem tourists nung metaloka aliba nung kanga mejungi kongshiogo, ta Shira-i ashi.

Mangatettep aliba mapang tourist tem aruba kanga ajemogo, aser gari senzüba nung tenokdangba agütsüba ajanga state tesem balala nung tourism dak sendakba inyakyim ajunga nung timtem ajurur, ta Minister-i ashi.

Assam aser Meghalaya indang chief minister tsünga jembishinü akaba sülen tensa angatettepogo, ta Shira-i ashi. Kidanger state ana tsünga gari senzüba nokdangba mesüra lenmang mokdangba atema temeden bushitsü kecha mali, ta pai ashi.

Mangatettep adokba mapang raksatsüba Assam-registered gari kibur nem Meghalaya sorkari compensation agütsütsü, ta Shira-isa sangdong.

Assam aser Meghalaya tsünga tenokdangba makai gari tem senzütsü tongtipang lir, aser Assam nungi taxi operators aser tanga gari kiburtem akhi mapang ama senzütettsüla, ta pai ashi. Kasaji Meghalaya-registered gari tema Assam nung tenokdangba makai senzüdaktsütsüla.

State ana lenirtem tsünga jembishinü angatetteper liaka asendenshir lenmang tem mokdangba mesüra shibangba ajanga tensa tamajungba kumdaktsütsü, ta Meghalaya Tourism Minister-i tekumandangtsü ashi.

Pai state anaprong nungi nüburtem dang süngjema alitsü ayongzük aser tesendaktep aser nüburtem takum aliba nung kongshitsüsa timtem arutsü aliba indang bilemdangtsü ajungshia liasü.

Akhi ama senzüsempongtsü, tourists tem mulungjang nung temulung lemdaktsütsü aser timtem majurui Assam aser Meghalaya tsünga gari tem senzütettsü asoshi sorkari tangsa temulung agüja mera agitsü, ta Shira-isa ashi.

Goa nung chiyongtsü ayoker aser talir na ajurutep



International Trade Fair, Goa nung Nagaland nungi oa shilem agirtem rongnung Tuli nungi "The Nagaland Farm" kibur Wb. Subonenba Longkumer (abelen) noksa nung angur. Pai süngo lu yima "Yaren Tea" adoker. (Goa August 25,2026).

Goa, Aug.26 (TYO) : Anogo asem asoshi ayongba Food & Beverage + Agro Pro 2026, International Trade Fair sentong ka Goa nung August 23 nungi tenzük liogo. Iba sentong nung state balala nungi chiyongtsü aser tajemtsü süngo züsenteta yanglua ayokertem aser itemji alitsü purtem alima tesem balala nungi arua dena liasü. Ibai MSME nung Raising & Accelerating Performance (RAMP) sentong ajanga ayongzükba liasü aser Nagaland nungia Nagaland government sentong ' Naturally Nagaland' ajanga chiyongtsü aser süngo

yanglua ayokertem tajangzük ngua denogo.

Iba sentong nung chiyongtsü tapu balala ayoker aser talirtem tsünga shishilemba tenzüksü asoshi o renema jembir zülutepba mapa aika takok ngua inyakogo. Nagaland nungi oa adenertem asoshia iba sentong ajanga tanga tesemtem nungi arurtem aika ajurua shishilembatsü tesentaktep yangluogo. Tajung kaji, iba sentong nung Nagaland state nem 'Best State Government Agency for Food Processing / Valuable Contributors Award' agüja liasü.

Delhi CM Rekha Gupta-i Delhi Lakshmi Yojana scheme tenzüksü



August 26, 2026 nü New Delhi nung 'Delhi Lakshmi Yojana' welfare scheme tenzüksüba sentong nung Delhi LG Taranjit Singh Sandhu, Delhi Chief Minister Rekha Gupta, Delhi Minister Ashish Sood aser beneficiaries tangokba noksa nung angur. Iba scheme kübok temsüa aliba tetsürtem nem ita shia sen 2,500 teyari agütsüsü.

New Delhi, Luroi/August 26 (Agencies): Bodhbarnü Delhi Chief Minister Rekha Gupta-i Delhi nung tetsürtem atema Delhi Lakshmi Yojana scheme tenzüksüogo.

Talkatora Stadium nung ayongzükba sentong nungji Delhi Lieutenant Governor Taranjit Singh Sandhu aser Delhi BJP Tir/Union Minister of State Harsh Malhotra na den Delhi minister tem, MP tem aser tongti ketdangsertem aika liasü.

Iba sentong nung Delhi minister tem Kapil Mishra,

Manjinder Singh Sirsa, Ashish Sood, Parvesh Sahib Singh Verma aser Pankaj Kumar Singh nunger; Lok Sabha MP tem Ramvir Singh Bidhuri, Manoj Tiwari, Yogendra Chandolia, Kamaljeet Sehrawat, Bansuri Swaraj aser Praveen Khandelwal nungera liasü.

Iba scheme kübok temsüa alir tetsür shia nem ita shia sen 2,500 teyari agütsüsü; mezüngbuba shilem nung tetsür 4,000 nem sanction letters lema agütsüogo.

Delhi Lakshmi Yojana

kübok temsüa alir tetsürtem nem ita shia sen 2,500 parnok indang bank accounts nung indangindanga inoktsüsü.

Iba sentong nung jembidang Chief Minister Rekha Gupta-i, iba scheme atema tang tashi nung tetsür lakh 9-i tenüng agüja lir, ta metetdaksü.

Laisa, Ato kilonser Narendra Modi lenisüba kübok Delhi sorkari tetsürtem akhümtsübuba ajungkettsüba den külemi tetsürtem nem tashi agütsüsü aser tetsürtem nungita maangka balala agütsüsü, ta metetdaksü.

Lok Sabha Speaker-i TMC MP 20 nem notice agütsüogo

New Delhi, August 26 (Agencies): Lok Sabha Speaker Om Birla-i Nationalist Citizens Party of India (NCPI) den adenba Trinamool Congress (TMC) MP 20 nem notice ka agüja parnok dang TMC-i parnok anentsütsü atema temepishiba agüja aliba dak sendakba nung anogo tenetnü tsüngda telangzüba agüjang, ta tuyuogo.

Mongolbarnü Solicitor General of India, Tushar Mehta-i Supreme Court dang, linük temzüng kübok TMC-i MP 20 ji anentsütsü atema temepishiba agüja lir, aser iba dak sendakba nung Lok Sabha Speaker-i MP 20 nemji notice agütsüogo, ta metetdaksü.

Lok Sabha Speaker aser House nung General Secretary na tenüng nung Mehta-i Chief Justice of India Surya Kant-i aniba bench nem iba osangji metetdaksü.

TMC 20 anentsütsü atema benokba temepishiba ken o menoa mangadangba atema TMC lenir Abhishek Banerjee-i benokba ken o angadangba mapang nung Mehta-i SC nem iba osangji metetdaksü.

Bench-i Mehta dang, "Iba ya notice agütsüba indang masü saka mapang telatet ka nung ken o tembangba indang lir," ta metetdaksü.

TMC-i par party nungi MP 20 jagi party toktsür NCPI nung aden, ta aitsür.

Abhishek Banerjee-i, parnok inyaksangshi nung ajemdaker linük temzüng nung anti-defection kübok parnok anentsütsüla, ta metetdaksü.

Lok Sabha Speaker-i notice agütsüba MP 20 ji Kakoli Ghosh Dastidar, Sudip Bandyopadhyay, Satabdi Roy, Prasun Banerjee, Rachana Banerjee, Jagadish Chandra Barma Basunia, Partha Bhowmick, Arup Chakraborty, Adhikari Deepak Dev, Sayani Ghosh, Bapi Haldar, Md Abu Taher Khan, Kalipada Saren Kherwal, Asit Kumar Mal, June Maliah, Mitali Bag, Khalilur Rahaman, Mala Roy, Sharmila Sarkar aser Yusuf Pathan nunger lir.

Nepal tzümetsüng lendong nung India nunger 105 samaogo

New Delhi, August 26 (Agencies): Bodhbarnü Tibet arrtsülen Nepal kübok Rasuwa district nung ajungbena tzümetsüng lendong tulu atalokba sülen India nungertema nisung 100 dak tali samaba osang jangjaogo.

Bodhbarnep 9:00 ako meta ajungbena Bhote Koshi ayong nung tzümetsüng ajanga Rasuwa district kübok Rasuwagadhi-Timure area kanga mejungi kongshiba den külemi anasa aliba district ana-Nuwakot aser Dhading-a mejungi kongshi.

Tzümetsüng ajanga nisung dang masü saka gari, osettsüset, apu aser kiojen-a aika ponger ao aser hydropower projects aika mejungi raksa.

Nepal Tourism Board-i ashiba agi, bendanger 291 aser Nepal nunger 93 densema raliwalir 384 tzümetsüng lendong nung samaogo.

Bendanger 191 nungji India nunger 105 densema lir. Tzümetsüng lendong nung samartem rongnung Australia, Netherlands, US, Malaysia, UK aser South Africa linüktem nungi raliwalirtema densema lir.

Nepal Tourism Board-isa, travel agencies, tour-guides,

local ketdangsertem aser security agencies den tongtepratepa osang metetpelaa bendenba sülen ang nisung asüba aser samaba osang tejangja metettsü, ta ashi.

Board-isa ainlen senzürtem aser parnok kibongtem dang osang tejangja memetet tashi olulu meproksü mepishi.

Nepal Army, Armed Police Force aser Nepal Police-i helicopter 14 den drones aser azü amshia nisung bushiba aser kümzükba maparen inyakdar.

Tang tashi nungbo Bhote Koshi ayong nung ajungbena tzümetsüng lendong atalokbaji mejangjar. Nepal Department of Hydrology & Meteorology-i tzümetsüngji Rasuwa nung tzünglu aruba agi masü, ta metetdaksüogo.

Ajungbena tzümetsüng lendong atalokba ya rürjep aliba awatsüng pokdangba agi asütsüa akok, mesüra anentsüh mesüra Tibet arrtsülen tatalokba kar ajanga asütsüa akok ta bilemer.

Nepal nung tzümetsüng agi tamajungba kongshiba district ji Rasuwa lir, iba dak alia tzümetsüng ajanga Timure aser Syafrubesi nata mejungi kongshiogo.

Lucknow nung tatsük agi küm shia nisung 4,000 dak tali asütsü

New Delhi, August 26 (Agencies): Tang Uttar Pradesh yimtiba, Lucknow nung kanga tatsük; temperature kanga atuba den külemi 'humidity' ajanga aika temang nung timtem adoktsü, ta Council on Energy, Environment & Water (CEEW)-i metetdaksü.

2015 küm nungi 2024 küm indang tsüngsang-mopung osang nung ajemdaker CEEW-i, 'humid' den külemi tatsük ya tamajungba dang kümra 2050 küm tashi nungbo Lucknow nung küm shia tatsük dak sendakba timtem ajanga nisung 4,000 asütsü, ta metetdaksü.

Taoba mapang India Meteorological Department (IMD) director general K J Ramesh-i, Global warming ajanga talisa Indo-Gangetic plains nung temperatures tali atur, ta ashi.

Paisa, "Lucknow ya Indo-Gangetic plains tiyongsü nung lir. Iba region kanga nemzüka aliba ajanga mopung marakzür. Humidity tamajungba akümba den külemi tatsük dak sendakba ajanga temang nung timtem aika adoktsü," ta metetdaksü.

CEEW-i, 2015 küm nungi 2024 küm tsüngda Lucknow nung tatsük aser 'humid' tali atuba anogo 289 liasü, iba mapang nungji maximum temperature tajemtibaji 35 degrees Celsius liasü aser humidity ji 60% dak tali liasü, ta metetdaksü.

2050 küm tashi nungbo Lucknow nung tatsük dak sendakba ajanga nisung asübaji shilem

50 tashi atutsüa akok. Lucknow nung nisung 1,000 shia nungi nisung 0.6 asütsü.

National Research Development Corporation India nung Climate Resilience & Health division nung tekolak Abhiyan Tiwari-i, yimtitem nung süngdong tali atemtsü nüngdak aser tali atsükba nokdangsü atema asalentong yanglur inyaksü nüngdak, ta metetdaksü.

इंडियन बैंक

Indian Bank

ALLAHABAD

ALLAHABAD

Zonal Office : Dibrugarh

T.R. Phukan Road, Chiring Chapori,

P.O.: Dibrugarh- 786001

E-mail: zodibrugarh@indianbank.co.in

KIOJEN

AYOKTSÜ

NOTICE

[SEE PROVISO TO RULE 8 (6)]

SALE NOTICE FOR SUBSEQUENT SALE OF IMMOVABLE PROPERTIES

E-Auction Sale Notice for subsequent sale of Immovable Assets under the Securitisation and Reconstruction of Financial Assets and Enforcement of Security Interest Act, 2002 read with proviso to Rule 8 (6), 6 (2) & 9 (1) of the Security Interest (Enforcement) Rules, 2002

Yangi public aser talisa sen apur (tem) aser Guarantor(tem) dang iba osang metetdaksür, Secured Creditor dang mortgaged/charge süa aliba tsünglanglen shia aliba kiojen ya **Indian Bank** nung Authorized Officer-i agiadokogo, aser iba kiojen ya **14.09.2026** anogo nung "Kong aliar yamaji", "Koma aliar yamaji" aser "Yangji aliba ajak" basis nung ayoktsü. E-auction ajanga ayoktsü aliba kiojen osang tejangja tsünglanglen metetdaksür:

Branch	A) Name of the Borrower/Guarantor/Mortgagor B) Due Amount	a) Details of the Immovable Property b) Property ID No.	a) Reserve Price b) EMD c) Bid Increment Amount d) Any Encumbrances on property		
Dimapur	A) Borrower- Mrs. N. Sashila Jamir, W/o Mr. Pallav Kumar Sharma, Address- Ward No. 20, House No. 854 (A), C-Khel Half Nagarjan, Dimapur, Nagaland, PIN- 797112 and Mr. Pallav Kumar Sharma, Address- Ward No. 20, House No. 854 (A), C-Khel Half Nagarjan, Dimapur (Nagaland), PIN- 797112. Guarantor- Mr. Kilemsungba Ao, Address- House No. 48, Near Ao Church, Imkonglenden Colony, P.O. + P.S.- Dimapur (Nagaland), PIN- 797112. Guarantor- T. Asemadangba, Address- House No. 06, Airport Road, Aoyimti, P.O. + P.S.- Dimapur (Nagaland), PIN- 797112. Guarantor- Mrs. K. Tainla, Address- House No. 873, C-Khel Kuda Village, Nagarjan, P.O. + P.S.- Dimapur (Nagaland), PIN- 797112. Guarantor- Mr. Takosashi, Address- Near Welcome Gate, Imkonglenden Colony, P.O. + P.S.- Dimapur, Nagaland, PIN- 797112. B) Rs. 49,13,955/- (Rupees Fourty Nine Lakhs Thirteen Thousand Nine Hundred and Fifty Five only) as on 01.08.2026 with further interest, costs, other charges and expenses thereon.	a) All that part and parcel of the property / land situated at Half Nagarjan, Dimapur, Nagaland covered by Dag No. 187, Patta No. 65 Measuring 00B-01K-04Ls of Nagarjan Block, Mouza No. 03 Dimapur, Nagaland in the name of Mrs. N. Sashila Jamir, Daughter of Late R. Nganshimongba having Deed No. SD-721/05 dated 30-09-2019. Bounded by:- On the North by: Land of Mr. Lingshi, On the South by: Land of Mr. Toshiba Longkumer, On the East by: Land of Mrs. K. Shangreingam, On the West by: Approach Road. b) IDIB50502043373	a) Rs. 1,37,76,000/- (Rupees One Crore Thirty Seven Lakhs Seventy Six Thousand only) b) Rs. 13,77,600/- (Rupees Thirteen Lakhs Seventy Seven Thousand Six Hundred only) c) Rs. 50,000/- (Rupees Fifty Thousand only) d) Not Known any		
Date & Time of e-Auction:- On 14.09.2026 from 1:00 PM to 5:00 PM with unlimited extension of 10 minutes		Last Date & Time for Submission of EMD Amount: 14.09.2026 up to 05:00 P.M.			
Osang tejangja aser telatetbatem metettsü atema Branch Manager : (A) Dimapur : 9612305626; (B) Zonal Office Dibrugarh: 9628610699 den tongtepratepang					
Bid asütsüpurtem dang online ajanga bid asüba nung shilem agütsü atema onok indang e-auction service provider PSB Alliance Pvt. Ltd. indang website (https://baanknet.com) reprangtsü mepishir. Technical teyari atema yimlibilema 8291220220 ajanga tongtepang. Registration status aser EMD status atema support.baanknet@psballiance.com dangi e-mail yokang. Kiojen osang tejangja aser kiojen noksa den telatetbatem atema https://baanknet.com nung reprangang aser iba portal dak sendakba nung mangatetjemba angatettsü atema PSB Alliance Pvt. Ltd., Contact No. 8291220220 ajanga tongtepang. Bid asütsüpurtem dang website https://baanknet.com nung kiojen bushiba mapang nung tekalen shia aliba Property ID Number amshitsü metetdaksür.					
Date: 25.08.2026, Place: Dibrugarh		Authorised Officer (Indian Bank)			



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 27, 2026

Lendong nokdangba sen achi nungbo !

Topur tajung Nagaland agi tetsübutüsü aser tetamatsü lima, Nagaland, küma odagi. Ibaji alima lendong tzümetsüng, menonok aser tashidak wara tamajung agi kangshiba agi masü saka lendong nokdangtsüba mapa inyaktsü atema SASCI (Special Assistance to States for Capital Investment) ajanga sen apua bener aruba dena mapa shitak meinyaki lema agitetba teka aser shisatsü agi asütsü. Item temulungjang aser tekajibo, atangji, menonok aser tzümetsüng danga tetsübutüsü taketba lir. SASCI sen ya Union government-i state nem küm 50 asoshi tetemlok kecha melii nübortem asoshi nüngdakba terenlok mapatem inyaktsü asoshi aputsür. Ajisüaka, iba ama senji apua bener arua mapa meinyak asen kinungertem lema agira, nübortem kechi koda lia aotsü ? Tanga state nungbo iba ama sen jagi nübortem asoshi lenmangsa lenmang yanglur, saka asen lima nungbo SASCI sen amshia Foothill Road tatsüka yanglupeter anena lir. Kasaji, Disaster Management purtemi nisungtem tzümetsüng lendong nungi kümzüksü asoshi Chümoukdima district kübok Diphupar nung sen crore tenet agi mapa inyaktsü lemzüksüba sen agi 'black topping' tatsüka otsür, shitakba tzümetsüng lendong nokdangtsüsabo mapa meinyaki toktsüba osangji temulung ashitsüka lir. Disaster Management Agency tetezü nübortem alima lendong nungi kümzüka anepalurtem lir. Itemji nübortem asoshi tsüraburtemang mesük. Parnok jagi nübortem alima lendong-tsüdong nungi kümzüka alitsüsa inyaker aser lendong mapang nunga parnokang tama ser lendong atalokdak oagi nübortem kümzüka mapa inyaker. Aji oda, parnokji nübortem asoshi 'Missionary' lir. Ajisüaka, nübortem lendong nungi kümzüksü purtemiang nübortem lendong nungi kümzüksü asoshi yokba sen samatsüra, nübortem kong anadaktsü ? Aji oda, Disaster Management nung inyaktertem o nübortem na külemi tzümetsüng nung samatsü atonger asü ? Mesüra nübortem lendong nungi kümzüksü melen nübortem lendongi idaktsütsü atonger ? Nagaland government mapatem nung inyaktertem rongnung shirnokisa nübortem meyong sen chitsüner Chiang, kechiyong nübortemi itemji memetet asert tebushia mashi, saka nübortem lendong nungi kümzüksü asoshi yokba senbosa machitsüla. Iba ama sen tashi matidaki chitetba temulungjangjibo onsarasa majung aser tajung tazü agibo matemtsü. Iba ama sen jagi aliba chiyongtsü koda achitsü ? Süoshi koda agitsü ? Gari nung koda amentsü ? Ki nung koda alitsü ? aser Chirnur koda mesütsü ? Tatidaktsüka lir. Atangji, tangbo Diphupar purtemi dang jembir saka, ashiko, district ajak nung 'Disaster Management' sen lemzüba agi Disaster Management atema masü saka Disaster tuluba ataloktsüsa atongtsür alitsüa akok. Aji oda, alima lendongtsüdongtem nokdangtsüba sentong agibo masayatsüla, kechiyong ketdangsertemi ochimashi inyakba ajanga tzümetsüng aser anentsü menonokdangtet nübortem taküm aser rongsen samara, ibajibo kecha agia memenoktettsü. Aji oda, Disaster Management agi Disaster Mismanagement küma pei lima aser nübortem akoksadaktsüabajibo alima nung meimchir anema inyakba mapatem rongnung tamajungtiba asütsü. Iba tashiji pei nübortem anema tamajung inyaktsü marendakba nisungtem nem yimten tashi agütsüabajibo nübortem asoshi, ashiko, atakatam asütsüa akok. Ibaji bilemdangra, tamajung inyaktertem dang tama nübortem taküm aser jakla melenshitsü nüngdak adoktsüa akok. Idangji dang Disaster Management purtemi dang masü saka government-ia nübortem nüken tsüba shitak anepalutsü.

OLEMSABANG

TEMESEPBA (ALCOHOLISM)

~ Mr. Maong Jamir,
Secretary, Finance and Property, ABAM

(Iba ocet ya Ao Theological Association (ATA)-i adokba Laishir Sangdong nung angutsü.)

(Yashi adok nungi...)

10. Detox aser Rehabilitation.

Detox tetezütemang den mapetba chiyungtsü mamshitsü / endoktsü merangba aser iba chiyungtsü agi timtem agütsübatemtemang nungi odaktsütsü merangba mapang. Detox ya 'secondary prevention' lir. Nisung ka kodang drug addict/alcoholic kümdir pa/la takümüji yi/drugs dak metaloker alir aser pa/la sasa anepalu mesüteter (dependant). Anungji iba mapang ya medical teyari kanga nüngdaker.

Parnok ya yi ajem dang mesüra drugs achidang danganema alir ama bilemer, aser kodang temesepba chiyungtsü mamshir iba mapang parnok shiranga doker. Iba dangji 'Withdrawal symptoms' ta ajar.

Detox mapang, yi/ drugs mamshi anentsü merangdangkhonta 24 nungi 72 tashi kanga timatemer. Iba mapang parnoki tesayuba kecha manganür. Anungji anogo 2/3 tashibo parnok temang anepaluba nung dang mapang endoktsüla. Iba sülen parnok shirangba (withdrawal symptoms) anener, tanem-tanemi tesayuba balala agütsütsü akok. Detox ya anogo 10-15 tashibo agitsüla.

Rehabilitation: Rehabilitation tetezü nisung ka taküm nung yi ajemba ajanga taoksaaser tesama alibajoko yi toktsür tanaben pei sempet bushiteta taküm lia aotsü, peikhuret koktettsü, pei yimya melenshia taküm alitsü, kinunger, kiyonger aser lokti den tesendaktep yanglutsü, aser Tsüngrem den tesendaktep yanglutsü asoshi tesayuba agütsüba aser angazükba mapang ka lir. Iba ya ita 3 bosa agitsü nüngdaker.

Tanü Arogotem aser lokti balalai detox sentongtem akar. Iba asoshi kanga pelar. Saka yi/drugs amshirtem anepaluba nung Detox ji teperi masü ta angatetsüla.

Tatem O :

Tanü asen Naga / AoArogotemi yi tongpang kanga meranga raradar. Joko NLTP act arur-a küm 35 tema aor saka tanü tashi iba tongpang ya mokoktetli lir. Government dang NLTP act 1989 ya kenyongi magientsüla ta noktakba, mesüra iba ozüng yaakangshiang ta Government aitsüa raraba dang masü saka Yi tongpang raratsü apusoba nung NBCC aser mungdangtemkechi nung tashi mait liasü ta ken meyipba lua reprangshia shisadangtsüla. Putu 3 tejaklen asen tsürapurtemi par putu den apet aser angatetba yari taküm bendanga agüja NLTP act asoshi raraogo aser koktetogo. Alima ainba ama asalentong(strategy) melenshia inyaktsü nüngdaker. **Saka putu asem tejaklen inyakba yimya kesa nung dang asenoki inyakra, asenoki NLTP act 1989 jibo kangzüka maneni lidaktsütsü akok, saka yi jemertembo asenoki mesottettsü.** Anungji tsüraburtem mangdang mesamadaktsüi tanü asen putu nung koma shisa kaa iba tongpang ya reretetsü ta shisadangtsüla.

Meteta alitsü kar:

- * Asenoki yi bottle noktangtsü meranger asü, yi jemertem nokdangtsü meranger? Yi jemertem noktangdi süra, yi bottle noktangba den asalentong tasen aika nüngdaker.
 - * **Lendongi maidang:** Sayura, tekümdangtsü o shira, angatetdaktsüra lendong nungi kümzüka alitsü.
 - * **Shiranga alidang:** Anepalura, tashidak shitak puteta tapet teyari (treatment) agütsüra taneptsü angutsü.
 - * "Nisung ka tajung akümtsüabajibo ozüng tesashi ayuba ajanga makümer, saka tesayutsü tim sayuba ajanga akümer"
- (Ocet nung tatalokba anogo aser mapang agüja alibaji. "A brief History of Liquor Prohibition in Nagaland", 10th July 2010 küm NBCC Prohibition Committee züluba nungi agizükba lir)**

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh Christian Forum Tir Pannalal nem bail magütsü



Chhattisgarh Christian Forum (CCF) Tir, Arun Pannalal

August 26, 2026: Chhattisgarh Christian Forum (CCF) Tir, Arun Pannalal-i pa bail nung chiochtsü atema temepishiba ken o agüja liasü saka Raipur nung aliba 2nd Additional Sessions Judge-i magizük.

Facebook nung Hindu nung tsüngrem Shiva dak sendakba nung pa tebilemba ka lemsatepba atema pa apuba sülen tang agi tanabenbuba pai bail temepishiba agütsü.

Arrshi küm 76, Pannalal ya August ita mezügbuba hopta nung pua liasü.

Bharatiya Janata Party (BJP) otongdar, Amit Chimnani-i, Pannalal-i Shiva dak sendakba tashishitsü o lemsatep, ta tai tongloksüba nung ajemdaker Raipur police-i pa pua liasü.

Iba sülen police-i Bharatiya Nyaya Sanhita kübok Arrla 196, 299 & 353(2) aser Information Technology Act kübok Arrla 67 nung ajemdaker pa anema ken o benoka liasü.

Central DCP, Tarkeshwar Patel-i, facebook nung Pannalal-i lemsatepba oji ajanga tanga yimsü amangertem melung yirutsüogo ta tai tonglokja liasü aser iba ken o bushisüngdangba nung cyber cell-i yaritepdar, ta metetdaksü.

Bushisüngdangertemi Pannalal indang mobile phone-a rakzüka ayu.

Pannalal apuba aonungji Bajrang Dal nung inyaktertem Pannalal'er kima adenshiba osang angashiba sülen tensa azüoktsü atema iba tesem jagi police tali yoksema liasü.

August 8 nü pa magistrate matsüngdangi anir ao aser anogo 14 tashi judicial ket nung ayutsü tuyua liasü.

Pannalal atema ken o jembitsüri pa bail nung chiochtsü temepishiba agütsü saka August 19 nü bail temepishibaji magizük. Ano maneni Sessions Court nem bail temepishiba agütsü saka August 24 nü magizük.

Pannalal apuba sülen Chhattisgarh Chief Minister

Vishnu Deo Sai-i yimjak nung, Shiva aser Shivling ya "Sanatan Dharma" nung kanga temeshi, ta metetdakja liasü.

Court nung ken o benoksang Amit Chimnani tenüng nung advocate Brijesh Nath Pandey-i ken o jembija liasü.

Pandey-i, tsüngremtem dak sendakba tashishitsü o jembiba ajanga loktiliba nung tesünap raksatsütsü, ta metetdakja liasü.

Ano külen August 9 nü senior journalist John Dayal aser meimchir temeden atema inyaker putir Cedric Prakash natia sangdong ka ajanga, Pannalal apuba ya minority tem temeden atema ola adoker ka ola nembangtsüba lir, ta metetdaksü.

Kasa sangdong ajanga, Pannalal-i mapang talangka nungi Chhattisgarh nung anti-conversion ozüing anema nokdaker, ta ashi.

Pa tangsa chiochtsü atema onoki takhangba agütsür, ta tenati metetdaksü.

Taküm March ita nung state assembly nung Chhattisgarh Freedom of Religion Bill, 2026 agizüka liasü aser August 4 nungi mapa küma benoker.

Pannalal'er jabaso, Vaibhav Pannalal-i, "Kübui state nung reshikangshi ajangshiba Khristanem atema ola adokba agi pa ola madokdaksütsü atema ketdangsertemi pa anema inyaker. Ozü lawyer temi temaba court ka nung maneni bail temepishiba agütsütsü," ta metetdaksü.

United States Commission on International Religious Freedom (USCIRF)-i Arun Pannalal ya 'Frank R. Wolf Freedom of Religion or Belief Victims Database' nung züngokogo.

August 7, 2026 nü Chhattisgarh nung anti-conversion ozüing mapa küma benokogo. Iba ozüing kübok yimsü melenshinertemi anogo 60 jelia district administration nem osang metetdaksütsüla.

Chhattisgarh freedom of religion Act, 2026 ya ozüing alema yimsü meyipdaksüba nokdangtsü atema lir. Iba ozüing kübok yimsü meyipdaksüba ketdangsüa agirtem- putir, pastor, maulvi mesüra yimsü lenirtemia jelia ketdangsertem nem metetdaksütsüla.

Iba ozüing kübok district ajak nung special courts amenoktsü aser item ama ken otemji ita trok tsüngda bentettsüla.

Chhattisgarh assembly nung anti conversion ozüing ya taküm March ita nung agizüka liasü aser tan ita tetenzüklen nungi iba ozüing benoker.

ANO GO ABEN TSÜNGREM DEN

Tindang Aser Shitak (T.Ken 119:137-144)

Kodangsa asenoki dokan nung oset alidir tajung, majung tendanger junger ta kuli zülua aliba repranger junger ta zülua aliba osettem alir. Kasaji chiyongtsü nunga tajung ta zülua aliba chiyongtsütem alir.

Tsüngremer O ji tendanger shitak ta ngutet. Ibaji kuli tejangja lir. "Ne tenangzükbatem tendangogo aser aji atangji, aji asünung ne tenzükeri aji meimer" (t.140). Ibai mi tesashi ajanga tendangba lir. Hon temeja metettsü asoshi mi tesashi nung tendanger, taribia yamaji tendanger. Asenoki Arogo otsü zünga aser Laishibaji reprangra, Tsüngrem O ji mi ajanga aoba angutsü. Abrahami ibai tendang aser shitak ta ngutet. Kongi aotsü memetet pai par ki toktsür ao saka pa Tsüngrem O kar liasü, aser Tsüngremi pa angu. Mosaia arem nung küm lir alidang Tsüngrem O tendang. Tenüsang Ken nung Dawidi mi ajanga aoba asenoki angur. Pai kechi inyak ? Pai Tsüngrem O ji tendang.

Laishibaji tendang aser tetendangba nung takok angu. Ibai ochi, tiyazü kecha maten. Anungji ibai ajaki amangtsü akok. Otsü ajunga nung shirnoki Kibuba dak amang parnoki ashitsü akok, "Nai Tsüngrem O dak metaloktsü akok."

Nai ne taküm nung Tsüngrem O ji tendanger asü? Na tang mi tesashi ajanga aotsü akok. Yamaji ka süra, nai timtem aremzükbak kuli kaji Tsüngrem O ji temerük, tasüngtet aser amangtsü tetemsü ta nai kuli angutsü. Ne sasa Tsüngrem O ji tendangang aser ibaji atangchichila ta metetang.

Indonesia nung pastor Dedi Saputra tang tashi tepuokdak lir



Pastor Dedi Saputra (ajichi)

August 24, 2026: Taküm February ita nung Indonesia nung Pastor Dedi Saputra apuba sülen tang tashi pa mechioker, ta osang ka ajanga metetdaksü.

Pastor Saputra ya Aceh lisopur ka lir aser Bengkayang, West Kalimantan nung alir.

Saputra-i pa indang TikTok account @tersadarkan5758 ajanga Aceh nung anema tesempa o jembia aser Tsüngrem atala, ta pa nem tai tongloksüba sülen Aceh

Regional police-i pa pua liasü.

Banda Aceh District Court nung obendangertemi, Saputra-i Tsüngrem atala aser social media ajanga tesempa o jembia, ta aija pa küm ana tepuokdak ayutsü obendang agütsü.

Public prosecutor Sutrisnabo court dang Saputra küm pezü tepuokdak ayutsü obendang agüjang ta mepishia liasü.

Judge Fauzi den associate judges- Zainal Hasan aser Said Hamrizal nungeri temerenshi

obendangji agütsü.

Ken o angadangba mapang nung pastor Saputra Dedi den pa atema ken o jembitsür liasü.

Court-i, atangji Saputra-i tesempa o jembio aser Islam ayutsü anema jembio, ta aitsü.

Pai aibelenba ya Criminal Code (KUHP) kübok Arrla 301 anema lir aser Criminal Penalty Adjustments kübok Law Number 1 anema lir, ta obendang agütsü.

Fauzi-i, "2025 küm October ita nung Defendant (Saputra)-i pa indang TikTok social media

account ajanga tesempa o jembia aser Islam yimsü atala. Pai inyakba ya Islam maitsü tejangja aliba Aceh nungertem rongnung tesünap raksatsütsü atema liasü," ta metetdaksü.

Saputra ya tamalenbo Islam yimsü amanger ka liasü saka pai Khristan yimsü agizük.

Court-i, Saputra-i yimsü balala amangertem tsüngda taremkütket raksatsütsü atema inyakogo, ta metetdaksü.

Saputra ya Sungai Betung,

Bengkayang Regency, West Kalimantan nung alir ajisüaka iba ken o ya Banda Aceh nung benoka liasü, kechiyong pai social media ajanga prokba o ajanga Aceh nungertem rongnung tesünap raksatsü.

Court nung ken o jembiba mapang nung public prosecutor rongnung katibo Saputra amokmerena, "ozüing kübok yimsü toktsür ka azüji tokshitsüla," ta jembia liasü.

District court ka nung Indonesia nung senso ka tepsettsü amokmerenbaji aikati aitsür.

Indonesia nung pei tangatetba mesüra tangar yimsü dak sendakba nung pei tangatetba lemsatepba atema senso ka tepuokdak ayubaji meimchir temeden anema lir.

Ken o angadangba mapang nung UIN Syarif Hidayatullah Jakarta, Dr. Makyun Subuki-ibo, Saputra-i jembiba oji tesempa o jembiba masü mesüra Aceh aser Islam nung jashidaksütsü atema jembiba o masü, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Zür****(n)** ayong ngo tila (small river fish)

* Zür rongnunga tulu tila lir.

Zürep**(v)** temulung shirang, kanga kurema bilem (agony, grieve)

* Kinunger sür mulung zürep tia nung mapang talangka alir.

OLONG PAITEP # 760301

1				2				3		4
5		6								
							7			
8										
										9
		10					11			
14										
16										

TIPLÉN

2. Auonungchiyongsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüing

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 76030 TELANGZÜBA**TIPLÉN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

Alima nung 'female competitive skateboarder' tantsütila ya California tsür Judi Oyama lir. La arishi küm 66 tain asüduang 2025 International Slalom Skateboarding World Championships nung shilem agiba ajanga iba alima otsü yanglua liasü.

Judi Oyama arishi küm 13 tain asüduang nungi skateboarding süa arur aser taküm October ita World Skate Games nunga lai shilem agia otsü yanglutsü sentong lir.

Oyama-i 1975 nungi professionally tokteptsü tenzük aser 2018 küm Skateboarding Hall of Fame nung zülüokogo.

Meghalaya sorkar school 1,124 nung tesayur kaka dang lir**Guwahati, August 26, 2026**

(Agencies): Meghalaya nung sorkar school 1,124 nung tesayur ka dang lir aser state nung tesayur mapa 893 tazüing lir ta sorkari Legislative

Assembly

nung metetdaksüogo.

MLA Mizanur Kazi-i government schools nung infrastructure indang osang metetnua asüngdangdang

Education Minister Lakhmen Rymbui-i iba osang lemsatep.

Tesayur mapa tazüing 893 nungi lower primary schools nung 748, upper primary schools nung 38, secondary schools nung 91 aser higher secondary schools nung 16 lir ta pai ashi.

Meghalaya government schools 76 nung science laboratories mali, 18 nung computer facilities mali aser school ka nung library mali ta Minister Rymbui-i assembly nung metetdaksü.

Sorkari Mission Education kübok maparen balala inyakdar aser iba ya infrastructure tajungba akümtsü atema lir. School aika nung ki tasentem yangluogo aser tanga nung teyangludak lir ta pai ashi.

NFR-i Hill Section nung Train Services melenshiba metetdaksür**Maligaon, August 26, 2026**

(TYO): Northeast Frontier Railway (NFR)-i New Harangajao station anasa railway tracks (Line-1 and Line-2) yanglushiba mapa maneni inyakdar aser iba atema train services nung temelenshi aliba metetdaksüogo.

Iba maparen ajanga Lumding-Badarpur Hill Section nung Line-3 ajanga dang train senzür aser train services nung temelenshi lir ta Chief Public Relations Officer Kapinjal Kishore Sharma-i sangdong ka

nung ashi.

Cancellation of Trains:

Train No. 15615 (Guwahati - Silchar) Express - 27.08.2026 nungi apusotsü aliba athir.

Train No. 15616 (Silchar - Guwahati) Express commencing journey - 28.08.2026 nungi apusotsü aliba athir.

Rescheduling of Trains:

Train No. 15650 (Narangi - Agartala) Express - 27.08.2026 nü Narangi nungi 18:30 hrs nung apusotsü.

Train No. 14619 (Agartala - Firozpur Cantt.) Express - 27.08.2026 nü Agartala nungi 19:00 hrs nung apusotsü.

Train No. 15608 (Silchar - Thiruvananthapuram Central) Express - 27.08.2026 nü Silchar nungi 22:10 hrs nung apusotsü.

Regulation of Train:

Train No. 12503 (SMVT Bengaluru - Agartala) Humsafar Express - 25.08.2026 nü tapet mapang nung apusotsü.

Assam CM-i Shivraj Chouhan & Nitin Gadkari den ajurutep**Guwahati, August 26, 2026**

(Agencies): Assam Chief Minister Himanta Biswa Sarma-i Union Agriculture Minister Shivraj Singh Chouhan den ajurutepa senden ka menogo.

Idangji Chouhan-i Sarma nem Pradhan Mantri Awas Yojana (PMAY) kübok housing support agütsütsü mulungba shidi agütsü.

Assam nung Rs 5,000 crore jungnua endoka ki tasen lakh 3.8 yanglutsü indang approval document agütsü ta CM Sarma-i ashi.

Centre sorkarisa tzümetsüing ajuruba tesemtem nung PMAY houses talila yanglutsü aser ano Assam süngolu tem nung housing support atema senotsü agütsütsü.

Union Minister Chouhan Shivraj-i Assam asoshi bilemja maneni yariba atema kanga pelar ta CM Sarma-i metetdaksü.

Iba senden nungsa Rashtriya Krishi Vikas Yojana (RKVY) kübok Rs 139 crore atema sanction letter nguogo ta Sarma-i ashi. Iba ajanga agricultural investment aser

sustainable farming jenjang ajungkettsü ta paisa shisem.

Sarma-isa Union Minister for Road Transport and Highways Nitin Gadkari den ajurutepa Assam nung road infrastructure atema jembiogo.

Tzümetsüing agi raksatsüba National Highways yanglushitsü aser network akangshitsü atema pai senden nung benoka jembi.

Iba senden nungsa Kaziranga Elevated Corridor aser Guwahati Ring Road dena tongtipang mapatongtem inyakba osang lemsatep.



Arunachal Pradesh kübok Namsai nung JACKPOT ta ser mezüngbuba Tai Khamti-language miniseries sayadang agiba noksa ka angur. Iba original miniseries sayaba sentong nung Deputy Chief Minister Chowna Mein, filmmakers, creators aser cast & production team züngsemtem aden. JACKPOT ya Tai Khamti indang otsütem nung ajemdaker Tai Khamti oshi agi yangluba miniseries ka lir.

Iran aser Oman na khen atema Hormuz corridor asoshi jembir

Dubai, Luroi/August 26 (Agencies): Ita trok jungnüa raraba mechi shibanga aliba Strait of Hormuz ketdangsütsü atema Iran-i kidanger Oman den jembishinü kaogo, aser Oman indang foreign minister-i iba tzü lenmang ajanga khen atema corridor lapoktsü indang yakta sangdongtsü imlar ta ashir.

Iran aser Oman ya hopta ishika strait ajanga rong tem senzüba azüoktsü asoshi jembishinüa arur, koba ajanga rara metenzükdang alima nung totzü aser liquefied natural gas shilem 20 shi bena liasü.

February ita rara tenzüker rong timba anena lir, kechiaser Iran aser US nati iba tesem ya azüoktsü raktepa linük anaprongi tenokdangba balala agüja lir.

Mongulbarnü Iran aser Oman nati strait ajanga "a joint temporary navigational corridor" lapoktsü indang jembir aser mines yua aliba müreksü mulungtep ta ashir.

"Strait of Hormuz atema temporary corridor ka amenoktsü aser shidakba nung akhi ama rong tem senzütsü asoshi anepalutsü yakta sangdongtsü ni imlar," ta Oman Foreign Minister Badr Albusaidi-i Iran foreign minister den sensaksemba sülen X nung post süa liasü.

US Tir Donald Trump, shibai taoba mapang Oman nung bomb pokloktsütsü amokmerena lir, pai taoba mapang jembiba ama strait nung mines ajunga agentsü nenshia ashi aser Iran dang mines mayutsü tekumdangtsü ashi.

US aser Iran tsüngta raraba kanga ajemaka yimjung

tezüngzüktep ka yanglutsü merangba nung anendaka lir, aser rong tem dak maneni amakba yong Strait of Hormuz ajangtsü ya tang tashi tebilemtsü lir.

Iran-i Deobarnü rong 45 blacklist asüba sangdong, koba Gulf energy producers temi Iran-i mokdangba nungi jenbutsü mechi 'ship-to-ship transfers' anendaktsütsü atema mera agiba ama ajiteter. Company kari blacklist nung aliba rong tem amshiba anentsü sentong lir, ta osangtem ajanga ashir.

Iran indang rongsenketzüng nung timtem tali agütsütsü mechi United States-i hopta tetenzüklen Iran den shishilempaba linüktem merenshitsü amokmeren saka tangsa tangbo temerenshi magütsütsü ta ashi.

Sanctions nungya Iran nungi totzü bener aruba nung yariteper ta temulung melemi aliba Chinese financial institutions tem maden.

US-i par rongsenketzüng senzüka yutsütsü merangba ya "gross lawlessness" inyakyim ka lir ta Iran-i aitsü aser linük aikati iba 'pressure campaign' nung madentsü tamang akar ta ashi.

Bodhbarnü Iran Foreign Minister Abbas Araqchi-i Iran indang ambassador to Beijing den senden ka amendang China den amalitep tajungba akumtsü nüngdakba ashi.

Tensa mejungi liaka US-i Middle East nung diplomatic missions kari ketdangsürtem meyipa yoktsü sentong lir, shirnok Iran den rara tenzüka sülen ajemtsü mesüra anizüker ao.

Iba mera ya ajanga

Washington-i Iran den raraba tsütsü tensa tamajungba makumtsü ama ajiteter, ajisüaka embassy karbo nübu tajemba nung lapoktsü.

Secretary of State Marco Rubio-i tembar linüktem dang US-i tangbo Iran dak asendenshir amaktsü meimlar aser iba melen kinük balala nungi tenongshi ang nongshitsü, ta ashi.

Ano US Secret Service ajanga Mongulbarnü sangdong ka nung, Iranian state television ajanga video ka sayuba nung Trump'er jabaso tanubosang Barron tepsettsü tasa indang jembiba meteta lir, ta ashi.

US nüburtemi iba rara indang approval asadangba tang tajemtiba jenjang nung lir, aser kasaji November ita midterm elections agitsü lia nüburtemi Trump nem akhum agütsüba ajema kumogo, ta Reuters/Ipsos polling nung sayur.

Iba rara nung nisung meyrirjang aika süogo, aser itemji timba Iran aser Lebanon nungi lir. Iran mitkar tashi kanga ajemtsüogo aser rongsenketzüng jenjang kanga mejungi lir.

Ajisüaka Iran-i Gulf nung kidanger linüktem amaktsü akoker aser totzü abenba rong tem amokmerener. US aser Israel nati raksatsütsü nükjidadong aliba Iran nuclear sentongtem kechi tia nung aliar mejangja.

Iranian army odongtar Brigadier General Mohammad Akrami-Nia-i ashiba agi, combat units nem hadir tasen agütsüogo aser technology tsütsü tangar dang nungi tajungba mitkar ana den raraba ajanga Iran sepaitem tongpang nung tajangshiba jenti lir.

SÜR KÜM 10 ABENSAR

“Nenok tebelemer aser khu reta abener ajak kü dangi arung aser ni nenok nem anisüngzük agütsüti” Mathi 11:28



Lt. T. TONGPANG IMCHEN
27.08.2016 - 27.08.2026

Na onok nungi pilar küm ter (10) süitemaka nü temeim anogo shia onok meketbanger alir aser teti onok mulung nung alitsü.

~ Temeim Kinungtsü, Chirnur aser Semchir.

Ukraine-i drone amshia Russia amak; nisung 3 tepsetogo



Moscow, Luroi/August 26 (Agencies): Ukraine-i Russia kübok tesem balala amakba sülen nisung asem tepsetogo aser Tambov tesem nung Russian e-commerce company Wildberries indang warehouse ka nung mi adoka liasü.

Tambov Governor Yevgeny Pervyshov-i Bodhbarnü ashiba agi, iba logistics centre ya mi agi ajunga raksatsüogo. Paisa, 100,000 square metre tulu iba facility nung mi adoka liasü, ta ashi. Facility tasazük ya football ground 14 shi den kasa asütsü.

Iba tesem amakba mapang nisung ka yirugogo, ta pai

Telegram messaging app ajanga ashi. Ajisüaka pai mi ya temsep metemsep iba idang osang kecha magütsü.

Ukraine-i manger mesangwa tsüngda Moscow nungi km 500 shi pilar Kotovsk tesem nung amendaka aliba iba Wildberries logistics centre ya maka liasü.

Ano Nizhny Novgorod tesem nunga drone agi amakba mapang industrial facility ka raksatsüogo, ta iba tesem governor-i ashi.

Lipetsk tesem nung nisung ka aser arishi küm 14 tain tanur ka drone teraksa ka tsüka mi adokba sülen süogo, aser Ukraine den arrtsü nung Belgorod tesem nunga drone agi amakba mapang tetsür ka tepsetogo.

Ukraine-i July tom nungi Wildberries facility tem maka arudar aser parnoki tawa Ozon indang facility tema maka arudar.

Company ana ya Russia nung kanga dang kara ainba company ana lir, aser tang parnok inyaksangshi nung tetsükdaktsü tulu adokogo.

Russia indang military supply chain nung shilem agiba atema Ukraine-i Wildberries aitsüogo. Moscow aser company yagi ashiba agi, parnok indang facility tem ya civilian tem atema dang amshir.

Kasa mapang nung Russia Ministry of Defence-i ashiba agi, parnok indang air defence system temi Ukraine nungi yokba drone 426 khazüka yokogo.

Moscow aser Kyiv napronglai parnoki civilain tem dak rangloker jenjang magir ta shia arudar, saka tang civilian asüba osang timba küma odar.

Nepal tzümetsüng lendong nung nisung 17 süogo



Kathmandu, Luroi/August 26 (Agencies): Nepal nung Tibet anasa tzümetsüng aluba sülen yimtsüng ishika apuongerogo aser iba mapang nisung 17 taküm samaba den lenmang, apu aser power project tem raksatsüogo, ta ketdangsürtemi metetdaktsü. Lendong atalokba sülen sorkari nisungtem kümzüktsü atema helicopter tem yokogo.

Rasuwa district kübok Syapru Besi aser Timure tesem nung tzü metsünger aliba ajanga

helicopter tem tanentsü mejungi liasü, ta ketdangsürtemi Bodhbarnü metetdaktsü. Iba tesem nung nisung 50,000 shi alir.

"Asürtem timba akümtsü akok aser kiojentema aika raksaogo," ta district administrator Narendra Pariyar-i Reuters news agency dang ashi. "Ajisüaka tangbo shia matatettsü," ta paisa shisem.

Pariyar-i, Bhote Koshi ayong kümbang nung alirtem

dang teküzmükba tesem bushia aotsü tetuyuba agütsüogo.

Arrtsü adener Tibet nunga China aser Nepal na tsüngda Gyirong county nung anentsüh aluba sülen nisung aika samar bushidar, ta Xinhua official news agency-i metetdaktsü.

Anentsüh yagi China nunga Gyirong port dak kongshiogo aser iba ajanga Shigatse tesem nung lenmang, communications aser power dak kongshiogo.

Tir Xi Jinping-i, samar alirtem takok tashi bushitsü mepeshiba

den, iba lendong yagi tanaben mekongshitsü atema monitoring aser early warning system tem akangshitsü ayongzükogo.

Nepal kübok Rasuwa district tzümetzüng agi kongshiba sülen Nepal Police aser social media nung nüburtemi lemsatepba video tem nung lishi tzü tenemtsüng leni yimzüka ayuba nguogo.

Ato Kilonser Balendra Shah-i tensa asadangtsü atema National Disaster Risk Reduction and Management Authority den jongdak senden ka ayongzüka menogo.

Nepal Army-i ashiba agi, parnoki lendong agi kongshir aliba tesemtemi helicopter tem aser disaster response personnel tem yokogo.

Kasa mapang nung Nepal Electricity Authority-i ashiba agi, hydropower aser solar facility nungi production capacity 430 megawatts raksatokogo.

Maneni highway tema aika shibanger lir, ta ketdangsürtemisa metetdaktsü.

Sechü Zubza Champions Cup final tongogo



Kohima, Luroi/August 26 (TYO): 1buba Atuo Mezhür Sekhose Super League - Champions Cup 2026 nung Mongolbarnü Sechü Zubza FC aser Tsütuo nuomia Youth Organisation (TYO) na mezüngbuba semifinal asaya Zubza FC-i goal 3-1 agi koka parnok final-i iogo. Iba asayamung ya IG Stadium, Kohima nung asaydar.

Mezüngbuba semi-final nung TYO-i asaya kanga junga tenzük aser Mhasilhoukho Chietsü-i minute 13buba nung mezüngbuba goal idakja liasü.

Ajisüaka asaya tanabuba shilem nung Sechü Zubza FC-i telangzüba agüja parnok rongnungi Aneizo M. Suokhrie-i minute 52buba nung goal ka idakja goal kasasa aküm. Iba sülen league champions SZFC-i asaya azioka asaya tenzük aser Pulovi Kiho-i minute 65buba nung par team asoshi

tanabuba goal idaktsü. Maneni Vikhozoto Zhünyü-i minute 79buba nung goal tasembuba idakja Sechü Zubza FC-i iba asaya goal 3-1 agi kokogo.

Asaya nung TYO captain Medoneituo Sekhose yiruba sülen minute 57buba nung pa Atejnjenba Yaden-i melenas liasü. Asaya nungsa Zubza captain Kekhrieletuo Tsira nem minute 89buba nung yellow card ka agüja liasü.

Iba asaya akokba sülen Sechü Zubza FC pur Champions Cup final-i iogo. Zubza FC-isa league nung kanga junga asaya-a asaya pezüprongla akokba sülen asayamung kokogo.

Mezüngbuba semi-final asaya nung Deputy Commissioner aser Chairman, District Sports Council, Kohima B Henok Buchem alakteta jaoker liasü.

Asaya nung referee

Kezevituo Vizo liasü aser Imlimerenla Jamir aser Medochülie Chütso na Assistant Referees liasü. Mhasikhonuo Paünüo Fourth Official aser Medozevi Punyü Match Commissioner liasü.

Tanabuba semifinal ya August 27 nü 6 ako nungi tenzüka IG Stadium, Kohima nung Mez & Co aser Vanguard Academy na tsüngda asayatsü. Iba asaya nung Chümoukedima District Football Association alakteta jaoker asütsü.

1buba Atuo Mezhür Sekhose Super League - Champions Cup 2026 ya Nagaland Football Association (NFA) tawabangba kübok Department of Youth Resources and Sports, Government of Nagaland den longjemer Kohima District Football Association (KDFA)-i ayongzüka IG Stadium, Kohima nung asayadar.

Bouaddi Man City nung denogo

Luroi/August 26, 2026 (Agencies): Manchester City-i Lille nungi midfielder Ayyoub Bouaddi pound million 85.6 agi alizükogo, aser iba ajanga Morocco nunger international asayar ya Premier League nung sen tasaktiba agi alizükba teenager kümogo.

Arishi küm 18 tain asayar yagi küm pongu atema tenangzüktepba yangluogo, saka pa international clearance angutsü nüngdaker. City-i pa atema mezüng pound million 81.4 agütsütsü aser add-ons pound million 4.2 agütsütsü.

Midfielders Rodri, Barcelona dang pound million 65 aser Tijjani Reinders, Al-Qadsiah dang pound million 52 agi ayongba sülen Enzo Maresca-i aniba team yagi Bouaddi alizükogo.

Pai taküm World Cup nung kang junga asayaogo aser pa Morocco pur asaya trok nung pongu nunbo tetenzük nungi asaya liasü. Pa ya Ligue 1 nung Lille atema-a kanga tongtibang asayar ka liasü.

Bouaddi-i alizükba taah yagi Manchester United puri 2024 küm Lille nungi France nunger defender Leny Yoro £58.9m agi alizükba ajatetogo.

Lille nungi 2023 küm

mezüngbuba asayaba sülen Bouaddi iba club nungi 96 ben asaya aser taoba season parnok tasembuba jenjang tonga asayaba mapang pai tongtibang shilem agia liasü.

Arishi küm 16 nung pa ya Lille senior team nungi asayaba sülen club nungi asayaba asayar tanobusang aküm, aser 2024 küm Lille puri Champions League nung Real Madrid akokba asaya nung pai kanga junga asayaba sülen pa ajaki jangja aküm.

Pa City nung England midfielder Elliot Anderson den külemi midfield nung asayatsü.

Kasa mapang nung City pur Chelsea nungi Argentina nunger midfielder Enzo Fernandez alizüktsü atema bid asütsü renema lir, saka iba tenangzüktepba ya yanglutettsü meyanglutettsü mejangja, kechiyong pa atema pound million 120 meshir.

Brazil nunger winger Savinho iba hopta Tottenham nung oa adenba sülen tang Bouaddi ya City nung denogo.

Spurs-isa, City nungi Egypt nunger forward Omar Marmoush loan nung anir aotsü mulunga agizükogo aser midfielder Nico Gonzalez-a Newcastle nung adentsü renema lir.

Starc-i Bumrah ajateta ICC No.1 Test bowler kümogo



nung No. 2 bo tongteter liasü. Bangladesh den asayamung nung pa nem Player of the Match aser Player of the Series naroküm agütsüogo.

Bumrah ita ana tashi No. 1 Test bowler aliba tang atsüngtokogo. Pa taoba mapang anogo 697 tashi temaba jenjang nung liasü, koba India nunger bowler ka temeba jenjang nung mapang talangtiba aliba liasü. Bumrah yiruba ajanga India aser Sri Lanka na asaya nung masayayteti lir.

Kasa mapang nung Leeds nung Pakistan innings ka aser run 103 akokba asaya nung England pacer Ollie Robinson-i wicket 8 agiba sülen pa jenjang 15 tejak dangi tua tang 11buba tongtetogo.

Pa indang teammate Josh Tongue-a jenjang 16 tejakdangi tua 17buba nung lir. Kasa Test nung paia wicket 8 agia liasü.

Galle nung Sri Lanka run 165 agi akokba asaya nung wicket 10 agiba sülen India nunger asayar Manav Suthar-a jenjang 28 tejakdangi tua tang 48buba nung lir.

Sri Lanka bowler Asitha Fernando aser Prabath Jayasuriya nata jenjang pongungu tejakdangi tua tang 15 aser 16buba nung lir.

Fernandes & Shaw nem PFA Players of the Year naroküm agütsü



Bruno Fernandes

Luroi/August 26, 2026 (Agencies): Manchester United captain Bruno Fernandes nem Professional Footballers' Association (PFA) Player of the Year naroküm agütsüogo, aser tetsürtem rongnungi Manchester City nungi asayar Khadija Shaw-i tang agi tanabenbuba iba naroküm agizükogo

Portugal nunger international asayar Fernandes yagi 2025-26

season nung Premier League assists record tasen ka yangluogo. Pai assist 21 süja Thierry Henry aser Kevin De Bruyne nati taoba mapang record yanglur aliba ajateta liasü.

Arishi küm 31 tain asayar yagisa taoba season goal teku idakja United pur Premier League nung tasembuba jenjang tonga asayaba mapang teyari agüja liasü.

Fernandes-isa May ita Football Writers' Association Footballer of the Year naroküm agizükogo.

Tetsürtem rongnungi Shaw-i taoba season goal 21 idakja küm asembuba adonga Golden Boot nguogo, aser küm ter tsüngda City puri mezüngbuba Women's Super League title akokba nung lai teyari agüja liasü.

Maneni City nungisa Nico O'Reilly nem Men's Young Player of the Year agütsüogo.

Arishi küm 21 tain asayar yagi League Cup final nung City puri Arsenal akokba asaya nung goal ana idaktsü aser pa taoba season FA Cup akokba team nunga densema liasü.

O'Reilly ya Team of the Year nunga külem City teammate Erling Haaland, Rayan Cherki aser Antoine Semenyo nunger den densema lir.

Team of the Year nung Arsenal nungi David Raya, Gabriel, William Saliba, Jurrien Timber aser Declan Rice nunger lir aser Fernandes o Brentford nungi Igor Thiago nata team nung densema lir.

Luroi/August 26, 2026 (Agencies): Mitchell Starc pa indang career nung tang mezüngbuba ICC Test rankings nung No. 1 bowler kümogo. Mackay nung Bangladesh den tanabuba Test asaya nung kanga junga asayaba sülen pa tang temaba jenjangi tuogo.

Iba asaya nung Australia nunger fast bowler yagi wicket 10 agi, kong mezüngbuba innings nung wicket 6 aser tanabuba innings nung wicket 4 agiba densema lir. Pai teyari agütsüba ajanga Australia-i iba asaya ya innings ka aser run 51 ka agi koka liasü.

Arishi küm 36 tain pacer yagi New Zealand nunger Matt Henry aser India nunger Jasprit Bumrah na ajateta temaba jenjangi tuogo. Starc tang Bumrah dang nungi rating point 10 agi timba lir.

Starc taoba mapang rankings

BILEMDANGANG

"Takzütsü temela. Angatettsübo tasak."